



■ FLEM

Paupra situaziun en Burkina Faso

(cp/gc) Lucia Wicki-Rensch ha orientau dacuort a Flem davart la situaziun dalla baselgia catolica en Burkina Faso, ina tiara el vest dall'Africa. La vischina da Trun ei responsabla per l'informaziun dall'Ovra catolica internaziunala d'agid «Kirche in Not». Succedida ei quell'orientaziun ella baselgia catolica a Flem duront dus survetschs divins dalla dumengia.

Il plevon da Flem, Eugen Yurchenko, ei staus engrazieivels che Lucia Wicki-Rensch ha informau davart Burkina Fa-

so. Leu maunchi la plievgia e las attaccas dils terrorists radicals islamics s'augmentien pli e pli. Dapi in temps fetschi era il virus da corona tema e sgarschur. Ei seigi perquei stau in segn da solidaritad ch'ins hagi astgau prender si la collecta per Burkina Faso. Quei ha legrau fetg Wicki-Rensch. Igl interess e la generusadad dalla pleiv da Flem e ses parochians motiveschien ella da s'engaschar per mitigar la miseria dils paupers dall'Africa.

Ual en connex cun il virus corona survegni «Kirche in Not» adina dapli damondas da s'engaschar tras projects. La situaziun economica seigi a Burkina Faso, sco en autras tiaras sutviluppadas, dramatica. Ils carstgauns han neginas entradas e piteschan dalla fom.

L'ovra d'agid «Kirche in Not» ha susteniu igl onn vargau la baselgia catolica en Burkina Faso cun varga 700 000 francs.



Sur Eugen Yurchenko, plevon da Flem, e Lucia Wicki-Rensch.

MAD